

忻州志卷九

知忻州直隸州事方戊昌編輯

城池

州城始築於後漢末西跨九原後魏肅宗熙平二年九月
又城肆州所治九原唐宋因而新之周九里二十步城
高二丈五尺池深一丈七尺明洪武三年知州鍾友諒
重修嘉靖十六年知州李用中加修二十八年周夢綵
濬陞治垣增設敵臺復以積雨城圯十之六七倡議捐
修躬親督視衆力不作旬日而大壞者完狹辰而半頽
者葺增卑繕陋逾月訖工萬厯二十四年巡撫魏公允

貞捐課金以甃磚石檄委太原府同知賈一敬知州張堯行董其事經始於四月訖工於二十六年十月磚厚七重石基八尺高四丈二尺周二千一百九十丈有奇陞三重深二丈闊丈餘四門東迎暉更名永豐南康阜更名景賢西留映更名新興北鎮遠更名拱辰宗伯余繼登記東北角陞三重蹟存餘止一重南北門外皆有關廂築郭

國朝因之乾隆九年十一月巡撫阿公遵

旨查辦城工檄飭確核估計經前知州謝廷琪查明城垣里數丈尺並城樓損壞除舊存物料外將應行添補物

料工價共估銀六千六百四兩二錢五厘具報在案十一年四月初四日巡撫阿公奏請將晉省應修城垣先後估需工料銀兩數目並酌議配定分年修復處所彙開清單進呈單開自己巳年興工始忻州城垣派在第五次應於乾隆癸酉年興修動撥節年積剩耗羨添湊敷用等因有案嗣於道光三十年前知州華典將坍塌過甚處略補葺旋即停止自我

朝乾隆十八年修後已百有餘年上溯前明萬厯二十四年迄同治年間近三百年爲時既久傾頽日甚前知州戈濟榮首先倡捐邀集紳商節次勸諭俾經費無絀經

始於同治七年四月迄同治九年十月所有工程一律竣事通詳有案現在規模崇煥高城深池不僅壯觀瞻資捍衛已也

楊維嶽曰地險山川邱陵也王公設險以守其國郡縣自西來北少擁護議者欲將負郭地栽榆柳挑品窖以時濬之良善但此地東宜稼南北宜圃小民止計近利栽木而奪稼圃其誰與我况肯捐以挑窖乎往年聞警暫挑既堪禦虜又免濬治且不失栽種宜從民便惟是北壕土鹵易頽外無居民宵行取捷者多闌入藩衛未固頻繕爲難竊謂愚民狎於防虜眩於修福倘從七賢

祠西北築護城堤迤邐東北高三四丈厚倍之植木堤
上下開圈門通行河南築墩與堤相應各建浮圖關截
水口遇警即塞圈門不特守固且民殷阜家詩書矣利
關郡城應多從者一勞永逸得無意乎

周人龍曰時平則籬棘足以防閑德散則深峻適資寇
盜雖莒因無備楚克三都而秦設金城漢窺軹道彼有
明之所以策三晉甯在此區區一忻而爲此區區一忻
計者又甯在栽榆品審乎楊公明於地脈每言津津又
以未可以堪輿之說禦兵戎也然自隆萬以後迂儒鋒
銳莫當卒以遊談誤國是若楊公者尙可云留心經濟

者矣今四海昇平八荒賓服民安盜熄俗美風清雖夜
戶可以不閉而豈徒恃此城郭溝池之固乎以視夫末
季之苟且倉皇拘迂鮮當實不知其相懸幾萬萬矣
竇容遽曰高城深池上以壯國威下以資捍衛所關非
細祇以承平日久官斯土者怠於從事往往執在德不
在險之說以自脫卸殊不知雉堞頽廢則政令無足觀
坑塹修整則百務自畢舉此必然之勢也方今

聖天子睿慮周詳勅令天下繕修城垣濬治隍池酌其緩
急而次第築鑿業經

撫憲查核奏明在案行見郡邑環列星羅基布以仁義

爲干櫓以心腹作障蔽斯無往非金湯之固矣

按州城失修幾三百年中間雖兩次修葺皆未能一律整齊以是日就傾頽幾無以限出入前知州戈濟榮在任最久經營相度每以需用浩繁興作非易遂首先倡捐復集紳商節次敦勸俾經費有盈無絀鳩工庀材始於同治七年四月迄於同治九年十月前後將及三年修繕完竣於是雉堞斯翬樓櫓崇煥又以餘資平治道路以利行旅可謂有心民事者矣工既畢因係民捐民修詳請獎勵廣文武學額格於部議未准

戈有碑記載入藝文共用

銀六萬有奇

昔孔子稱子路治蒲三善先舉溝洫深治墉屋

完固喜其民之盡力不偷余於忻之修城亦喜其急公
好義力役之舉踴躍趨事然亦由二百餘年涵濡
教澤故民經之營之絕無計功之心而終始無倦也

忻州志卷十

公廨

州治在東門街宣化坊明洪武初建

學正署在學宮東

訓導署在學宮西

吏目署在大堂西

都司署在州治西南

考棚在州署東

道光十三年前知州李培謙創建碑記並經費章程載入藝文

常平倉在州署東

九原驛舊在南門內二星坊街後裁驛丞號移儀門東

演武場在南門外東

申明亭在儀門西

燕喜亭在南城上

陰陽學在儒學東久廢

醫學在十字街南久廢

僧正司今在關帝廟

道正司在白鶴觀

按舊志載都察院在治西久廢雍正元年改建節孝祠
察院在治西布政司按察司俱在州署後街旌善亭在
儀門東迎賓館在儀門西九原邈邈所在丁字街東草

場在儀門西後移西岡上舊學址公館二一在石嶺關
一在忻口堡官亭二一名觀風在南郭外一名迎節在
北郭外均皆久廢州署自前明洪武初建迄今五百餘
年中間重修幾次年遠無考同治八年前知州戈濟榮
自大門至二堂全行重修上房仍舊大堂以後規模改
易悉非當年舊制矣

忻州志卷十一

學校

書院

義學附

忻州儒學在州治西北舊在治西南九龍岡後晉天福二
年建金天德大定間知州傅慎微繼脩元皇慶間知州
白朝列又脩明洪武三年知州鍾友諒宣德天順間學
正楊璣知州夏至明次第繕葺成化間知州劉清重脩
陳璧記宏治五年知州王軒徙建今所規模宏敞視舊
有加徐溥李東陽胥有記東陽記曰王侯重煩民不欲
有所徵適發地得藏錢十萬曰此可以供役矣物計而
工給之沛然有餘嘉靖十一年知州韓希顏增脩十八

年學正徐宗堯闢學門設射圃建講堂黨承志記萬厯
崇正間知州楊維嶽丁元模重脩

國朝康熙十六年知州柯弼倡脩二十七年知州金玉相
五十八年署州牧蔡夢奇繼脩

射圃在明倫堂東

舊額歲科兩試入學十五名雍正二年經巡撫諾公條奏
文盛之區忻居其一加增學額五名自是歲科兩考文
武入學俱二十名

廣額三名咸豐七年因厯次捐輸奉文永遠加廣學額
二名十年又因厯次捐輸奉文永遠加廣學額一名

府學一名

載學政全書在忻州屬各學憑文取進自道光十三年後多取入州學

廩膳生員三十名四歲貢其三

增廣生員三十名

附生無定額

武生無定額

定襄縣歲科兩考文武入學各十二名

廩膳生員二十名

增廣生員二十名

靜樂縣歲科兩考文武入學各八名

廩膳生員二十名

增廣生員二十名

順治九年禮部題奉

欽依刊立卧碑曉諭生員

朝廷建立學校選取生員免其丁徭厚其廩膳設學院學
道學官以教之各衙門官以禮相待全要養成賢才以
供

朝廷之用諸生皆當上報

國恩下立人品所有教條開列於後

一生員之家父母賢智者子當受教父母愚魯或有爲
非者子旣讀書明理當再三懇告使父母不陷於危

亡

一生員立志當學爲忠臣清官書史所載忠清事蹟務須互相講究凡利國愛民之事更宜留心

一生員居心忠厚正直讀書方有實用出仕必作良吏若心術邪刻讀書必無成就爲官必取禍患行害人之事者往往自殺其身常宜思省

一生員不可干求官長交結勢要希圖進身若果心善德全上天知之必加以福

一生員當愛身忍性凡有司官衙門不可輕入卽有切己之事止許家人代告不許干與人詞訟他人亦不